

Bouxgeq naeuz, faex aeu naeng, vunz aeu naj. Dwg ha, bouxvunz ma lajmbwn, cungj siengj ndwenngoenz gvaq ndaej miznaj lai di. Lienz lwnyez hix rox guh vunz miznaj cij ndei. Ciuq gou ngonz guh boux vunz simsienh hauqgingj bouxlaux, vih guek vih minz haenqguh daengj, yienghneix cei q miznaj.

Miz baez ndeu, gou cam daeglan gou: “Ngoenzneix mwngz daenj geu buh neix bae hagdangz, roxninh lawzyiengh?”

De angqvauvau diuqyoekyoek dwk naeuz: “Gyoengq doengzhag gou haenh naeuz hab ndang ndei yawj engq mbauq, gou dingq le, ndaw sim angqyaepyaep, roxninh miznaj dangqmaz!” Dingz le yaepyet youh naeuz: “Daxbuz, bohme hix gou okbae ra ndaej ngaenz lai, hwnj ndaej aen ranzlaeuz moq youh sang youh rongh youh gvangq, dajcang ndaej youh gyaunde, vanzlij cawx gij gyasei, dengi gauhdangj haenx ma, doengh gij doih gou cungj iet fwngzmeh haenh gou ndaej gwn ndei youq ndei, lumj baenz duz roeglaej doek roengz aen loz haeuxsan bae he, gou dingq le, miznaj raixcaix.”

Gou doq lumh aen gyauej daeglan doq naeuz: “Danghnaeuz mwngz dingq gij vah lauxsae, gaujsi ndaej ciengj ma lai youh roxsoq roxleix, yienghneix couh engq miznaj lo.”

Daeglan gou fajnaj sikhaek naeuqnet hwnjdaeu, dauqfanj ienq gou naeuz: “Cungj gvaic mwngz! Bingzseiz mwngz cungj mbouj hawj gou guh hongranz. Lauxsae heuh dou ngoenznaengz youq ranz lai bang bohme hix gij hongranz swheij guh ndaej haenx, caemhcaiq lij aeu hagha cawj ngaiz cawj byaek, vanzlij gag sousib ndaw rug bonifaenh, gij saeh swheij gag guh, gaej heuh bouxlaux bangcoengh. Hoeng gou baenzneix hung cawz rox baet ranz, gizyawz cungj mbouj rox guh saek yiengh.



Mwngz gangj gij doengzhag gou cam daengz, gou miznaj lwi? Gou siengj swiq vanj, mwngz lau deng vanj vaih, lij lau gvej deng fwngz gou ok lwed dem; gou siengj gag cien gyaeggaeq, mwngz youh lau deng cien remj; gou naeuz lienh cawj haeuxngaiz, mwngz hix doeng lau sae lau, mwngz gangj yienghneix, gou youq baihnaj gij doih gou saet mbouj saet naj ne?” Gangj sat, fajnaj de saepsetset ngaemgyaeu dwk.

Gou dingq le, najmong raixcaix, vaiqvaiq nai de naeuz: “Neix dwg aenvih gyaiz mwngz, siengj hawj mwngz lai miz di seizgan yawj saw, lai hag ndaej di cihsiz, daengzseiz gauj ndaej hwnj hagdangz ndei, ra ndaej hong ndei guh, gvaq gij saedcej vuenyungz, bohme hix mwngz laux le, hix ndaej yiengj mwngz gij fukheiq.”

“Daxbuz ha, lauxsae lwnh dou naeuz, seiziq mbouj guh hongranz, yienghyiengh cungj dwg bouxlaux bang, daengz hung caeuq bouxlaux doxbiek le, couh raen fangz gaemx-daengx.”

Yienghneix, gou cijndaej dapwngq de.

Yaepyet, de youh doiq gou gangj: “Daxbuz, mwngz caeuq bohme hix gou gangj, gvaqlaeng gaej bae gij banmizyinx bauqmingz hawj gou hag

neix hag haenx, hag diuqfoux yiengh ndeu couh ndaej lo. Hag lai goq mbouj gvaqdaeu, dwg bekbek va ngaenz, caen dwg ngaenz vut roengz raemx——mbouj miz sing.

Doengxhaemh, gou ninz youq gwnz mbonq boekfan, baenzlawz hix ninz mbouj ndaek. Dwg ha, byawz hix siengj miznaj, hoeng lawzyiengh cij miznaj?

Miz boux naeuz, doenghboux gangj baizciengz, yienjok gyoengqde miz ngaenz lai, baengzyoux hix miz lai, coenz vah ndeu, couh dwg miz bonjsaeh. Hoeng, mwngz naemjnaemj, neix mbouj dwg saj baizciengz sai ngaenz? Yienghneix, gyoengqvunz vihliux miznaj, boux gaen boux, miz di daj laiandai caubanh, hix miz di lawzyiengh cungj guh mbouj ndaej daengz, gyoengq nyiegseiq nanz vih cingz lo. Seizneix guek raeuz cienz-bouh duetgungz, byaijhaeu le siuj-gangh sevei, boux fouqmiz gaej daih cau daih banh, mienxndaej miz di vunz youh dauq gungz, doengzseiz, gwnzbiengz lij miz binghra, raeuz aeu fuengzre cijndaej; gaej vihliux miznaj couh siengj doenggvaq lwnyez “okmingz” daeu yienh’ok, raeuz aeu gaengaenj “gemjmbaeu”, hawj gyoengq lwnyez aen mbwndeih vaiqvued! Raeuz wnggai vih guekcoj

raeuz fukhwng cij baenz, guekcoj fouqgiengz, raeuz engq miznaj.

Caenh vih swheij miznaj lawz ndaej doxndei caez youq, sevei youh lawz huzndei? Gou geiqndaej: Miz boux suekhuq vaiq soengq ndeu hai ci re mbouj daengz, bungz deng aen cihung ndeu, boux suekhuq vaiq soengq haenx gvi h youq gwnz dei h boizlaex, boux cawj ci yawj le yawj, couh heuh de bae cawx bingz raemx ndeu daeu, hoeng, cawx raemx dauqfanj seiz, mbouj caiq raen boux cawj ci haenx lo, seizhaenx, mboujdan boux suekhuq vaiq soengq gamj-doengh, lienz gij vunz humx yawj haenx hix iet fwngzmeh haenh mbouj dingz, cungj naeuz boux cawj ci haenx rox guh vunz. Dwg ha, aen naj louz hawj vunz, hix dwg hawj swheij louz. Danghnaeuz vih swheij miznaj, yienghyiengh cungj ceng aeu hingz, couh deng vunz biqmyaiz, cungj deng vunz naeuq, caemhcaiq youh sieng daengz aen ndang bonifaenh, aen hux neix dwg luenh fat beizheiq cau h baenz hane. Mwngz ngeixngeix yawj, yiengh neix baenzlawz lij miznaj ne? Baengzyoux, vihliux bonifaenh, vihliux guek raeuz fukhwng, raeuz aeu geiq:

Vunz cungj siengj miznaj,
Gaej yungh saj funghlouz,
Bouxboux daiq ndei daeuz,
Louz naj hawj vunz ndei.
Raeuz dwg vunz Cungguek, engq

aeu geiq:
Guek raeuz ndaej fukhwng,
Fangzhwnz hix miznaj,
Saedyienh yendaiva,
Faex gwnz bya hix anq.

Baengzyoux, guek raeuz saedyienh aen muzbyauh bak bi daih’it, raeuz miznaj, daengz saedyienh aen muzbyauh loqsiengj Cungguek fukhwng hungmbwk Cunghvaz Minzcuz, raeuz couh engq miznaj.

Baengzyoux, vih aen naj guek raeuz roengzrengz haenqguh ba!

165. Cam:

Haet neix mwngz okdaeuj,
Duz maz dai daihloh?
Haet neix mwngz okdaeuj,
Duz maz baij seiqfueng?

Hoiz:

Haet neix gou okdaeuj,
Duzndwen dai daihloh,
Haet neix gou okdaeuj,
Duzma doh dawz bae.

166. Cam:

Haet neix mwngz okdaeuj,
Duz maz ndwn song baih?
Haet neix mwngz okdaeuj,
Duz maz baij seiqfueng?

Hoiz:

Haet neix gou okdaeuj,
Saecej ndwn song baih,
Haet neix gou okdaeuj,
Go’ndoeck baij seiqfueng.

167. Cam:

Gou cam mwngz beix ha,
Gaiq maz gaeu vaiz geq?
Gou cam mwngz beix ha,
Gaiq maz rin req fouz?

Vah Duenz

谜语

□ Soucomz Cingjeix Veiz Daz

Hoiz:

Lwgyep youq gwnz congz,
Gaiq de gaeu vaiz geq,
Vunz cien haj nyeqngaq,
Gaiq de rin req fouz.

168. Cam:

Gou cam mwngz beix ha,
Gaiq maz sang hamj mbanj?
Gou cam mwngz beix ha,
Gaiq maz amj gwn vunz?

Hoiz:

Gou naeuz mwngz nuengx ha,
Hoenz feiz sang hamj mbanj,
Gou naeuz mwngz nuengx ha,
Bakdou amj gwn vunz.

169. Cam:

Gou cam mwngz beix ha,
Gaiq maz daep duzmbaj?
Gou cam mwngz beix ha,
Gaiq maz haj duzlungz?

Hoiz:

Fwn doek mwnqfefe,
Gaiq de daep duzmbaj,
Biuz fouz youq gyang dah,
Gaiq de haj duzlungz.

170. Cam:

Gou cam mwngz beix ha,
Gaiq maz daep duzngieg?
Gou cam mwngz beix ha,
Gaiq maz rwed duzlungz?

Hoiz:

Fwn doek mwnqfefe,
Gaiq de daep duzngieg,
Raemx dah lienzfwdfwd,
Gaiq de rwed duzlungz.

(24)

